

11 NOV 2000

Mahathir-OIC

MAHATHIR BERLEPAS KE QATAR UNTUK SIDANG OIC

KUALA LUMPUR, 11 Nov (Bernama) -- Datuk Seri Dr Mahathir Mohamad hari ini berlepas ke Qatar bagi menghadiri sidang kemuncak Pertubuhan Persidangan Islam (OIC).

Pesawat eksekutif kerajaan yang membawa Perdana Menteri berlepas dari Lapangan Terbang Sultan Abdul Aziz Shah di Subang ke Doha, ibu negara Qatar, pada 9 pagi.

Turut berada di lapangan terbang bagi mengucapkan selamat jalan kepada Dr Mahathir ialah isteri beliau, Datin Seri Dr Siti Hasmah Mohamed Ali serta juga Timbalan Perdana Menteri Datuk Seri Abdullah Ahmad Badawi dan beberapa menteri.

Dr Mahathir akan berucap mewakili kumpulan negara Asia pada upacara perasmian sidang itu esok.

Sidang kemuncak tiga hari itu akan dirasmikan oleh Emir Qatar, Sheikh Hamad Khalifa Al Thani. OIC mempunyai 56 anggota.

Selain menghadiri persidangan, Dr Mahathir juga dijadualkan mengadakan pertemuan dua hala dengan beberapa pemimpin termasuk Presiden Palestin Yasser Arafat.

Ulama terkemuka Prof Dr Yusuf Qardawi turut dijadual menemui Dr Mahathir.

Dari Doha, Perdana Menteri akan terus ke Brunei Darussalam bagi menghadiri sidang kemuncak forum Kerjasama Ekonomi Asia Pasifik (Apec).

-- BERNAMA

AKT AZZ MAI